



## STINAPA TA INFORMA

NATURA LESA I SER HUMANO TA UNU!!!

E kas di Victor Winklaar ta dunabo un sintimentu di trankilidad, meskos ku su doño amabel. Ora Victor papia di su bida e ta trankil i e ta pisa su palabranan bon. Turesten pafó di su kas ta un kako-fonia di zonido di lora, prikichi i otro para ku ta warda nan búrt pa haña kuminda. Kuminda ku Victor ta duna nan tur dia. Por ta sobrá di pan, pero e sa kumpra buskuchi pa nan tambe. "Asina nan ta laga mi mata di fruta na pas anto mi no tin mester di zundra nan i kore ku nan manera mi bisifanan" e ta hari chikí chikí. "Esei ta mi ruman a siña mi; ora ku e ta sembra su maishi, semper e ta tene un skina di su kunuku p'e paranan. Einan e no ta kore ku nan ni pone spantapara. E ora ei ta einan so nan ta keda. "T'asina mester ta tambe" e ta splika: "Dios a duna hende e konosementu di sembra i kosechá alimentashon pa nos por yuda e animalnan ku kuminda tambe." Victor ta nasé na Boneiru i ta kasá ku su Mirna. Su antepasadonan tambe ta di e isla aki: "Segun historiadónan manera Hartog na 1742 dos ruman, kaptan di barku ku nòmber Winklaar a bin di Hulanda. Un a keda biba na Kòrsou i e otro na Boneiru". Victor tin 9 ruman mas, i ela bai St. Dominicus skol i despues kaba Mulo. Tambe el a studia hopi riba su mes, manera estudio di estilonan di bida Oriental. Esei ta riparabel na e státua paresido na Buda ku ta dominá su sala. E sistema di bida aki a siñ'é ku naturalesa i hende ta unu! Na 1969 el a drenta polítika ku Union Patriótiko Boneriano, i komo tal a keda nombrá un dado momentu komo Gezaghebber Suplente, i despues diputado. Durante e periodo ei e tabata traha na Sociale Verzekerings Bank (SVB), kaminda el a bira asta hefe un dado momentu. For di 1996 e por a gosa di su penshun pero tòg el a akseptá e puesto di hues komisario. Di e tempu ei e ta kòrda ku no tabatin hopi kaso penal ku tabatin di haber ku naturalesa ainda, manera kaminda a kibra lei kontra di kuementu di karkó i turtuga. Afortunadamente esei a bira mas mihó awor. Na Hato el a traha su propio kas. Den su infansia e tabata bin piska kaba den e barío ei, i no tabatin nada mes ainda eibou. E suela ta kleps kaminda palu tin difikultat pa krese, pero el a laga bora buraku pa por planta su palnan di fruta. Esei ta dunand'e hopi satisfakshon i fruta awor, manera bakoba i papaya. E ta perkurá si pa e piki nan ora ku nan ta bèrdè ainda, i laga nan hecha den kas. Asina e no tin problema ku para di mondi. Su kas tin un dak di betòn ku a ferf blanku pa reflehá kalor di solo. Esei ta funshoná perfektamente i ta rekerí poko manten-shon. Asina e ta sobra mas tempu pa su hòbinan ku ta asamblahe di kòmputer di piesanan los i toka kitara. Anto ora ku e sobra tempu e ta yuda hende skirbi karta pa instanshanan ofishal. Fuera di esei e gusta kaminata den naturalesa manera na Naguati, Washikemba of Barcadera. Den Naguati e konosé un par di kueba ku lago bou di tera ku poko hende sa di nan, i den Washikemba tin e piedranan bunita bèrdè ku ta medio piedra presioso. Pero riba tur kos e gusta "Trapi" (1000 Steps) einan bo por snòrkel hopi bon i siña komprondé ta dikon turista gusta bin akinan tantu asina. Victor Winklaar: "Nos tambe ta un djente den e rèchi ku ta naturalesa e ta p'esei nos mester biba den harmonia kuné."

*Skirbí pa Marcel Nahr.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESAS



**Traha huntu na un desaroyo duradero pa Boneiru**